

## Upendo—Ushahidi wa Uanafunzi

*Hivyo watu wote watatambua ya kuwa ninyi mmekuwa wanafunzi wangu, mkiwa na upendo ninyi kwa ninyi—Yohana 13:35.*

**K**atika mkutano huu wa mwisho na wanafunzi Wake, matamaniao makubwa ambayo Kristo aliyaelezea kwao yalikuwa kwamba wapendane wao kwa wao kama alivyowapenda. Alisema tena na tena kwamba “Ninawaamuru” alisema kwa kurudiarudia “Mpendane ninyi kwa ninyi” Amri ya kwanza kabisa Yesu aliyotoa alipokuwa na wanafunzi Wake peke yao katika chumba cha juu ilikuwa “Amri mpya nawapa, Mpendane. Kama vile nilivyowapenda ninyi nanyi mpendane vivyo hivyo.” Amri hii ilikuwa mpya kwa wanafunzi maana walikuwa hawapendani kama Kristo alivyowapenda.

Aliona kuwa mawazo na misukumo mipya lazima viwatawale, na kwamba lazima watumie kanuni mpya; kwa njia ya maisha Yake na kifo Chake, wangepata maana mpya ya upendo. Amri ya kupendana ilipata maana mpya kupitia katika nuru ya kujitoka Kwake kafara. Kazi yote ya neema ni huduma endelevu ya upendo, kujikana nafsi, jitihada za kujitoka kafara. Kila saa ya maisha ya ushindi wa Kristo ulimwenguni, upendo wa Mungu ulikuwa ukitiririka kutoka Kwake katika mifereji isiyoziilika. Wale wote waliojazwa na Roho Wake watapenda kama Yeye alivyotupenda. Kanuni zilezile zilizomwongoza Kristo zitawaongoza wao katika kuhusiana na wengine.

Upendo huu ni ushahidi wa uanafunzi wao. Yesu alisema “Hivyo watu wote watatambua ya kuwa ninyi mmekuwa wanafunzi wangu, mkiwa na upendo ninyi kwa ninyi.” Watu wanaposhikana pamoja bila kulazimishwa, au kwa matakwa binafsi bali kwa upendo, huonesha kutenda kazi kwa mvuto ulio juu kuliko kila mvuto wa kibinadamu. Palipo na huu umoja, ni uthibitisho kuwa sura ya Mungu inarejeshwa ndani ya mwanadamu na kwamba kanuni mpya ya uzima inakuwa imepandikizwa. Inaonesha kuwa kuna nguvu katika asili ya Uungu ya kustahimili mawakala wenye nguvu za uovu na kwamba neema ya Mungu hushinda ubinafsi uliorithiwa katika moyo wa asili.

Upendo wa jinsi hii ukionekana kanisani, utaamsha ghadhabu ya Shetani. Kristo hakuwaonesha wanafunzi kuwa njia yao itakuwa rahisi. “Iwapo ulimwengu ukiwachukia, mwajua ya kuwa umenichukia mimi kabla ya kuwachukia ninyi. Kama mngekuwa wa ulimwengu, ulimwengu ungewapenda walio wake; lakini kwa kuwa ninyi si wa ulimwengu, bali mimi naliwachagua katika ulimwengu, kwa sababu hiyo ulimwengu huwachukia. Likumbukeni lile neno nililowaambia, Mtumwa si mkubwa kuliko bwana wake. Ikiwa waliniudhi mimi, watawaudhi ninyi, ikiwa walilishika neno langu watalishika na lenu. Lakini haya yote watawatenda kwa ajili ya jina langu, kwa kuwa hawamjui yeye aliyenipeleka.” Injili itahubiriwa kwa mapambano makali, katikati ya upinzani, hatari, hasara, na mateso. Lakini wale wanaofanya kazi hii wanazifuata tu nyayo za Bwana wao

(Tumaini la Vizazi Vyote, seh. 2, uk. 291–293).